

## BOCHOR REAK' 22AK' ATHWAR

### Onor

Kristre adi manotan dularia Go-Baba, boeha-miserako- jotoko Jisu marani

Teheñak Bhage Sombatre bon anjometkana je Kurus do jotowak reak' muat do ban kana; menkhan noa do mahima reak' dahar kana. Jisu do noa Kurus hotete, acak harkhet saset, gujuk ar beret ruarok reak' bhede sodoretkana. Uni abo sanamko nijak jion, Uni lagit alae lagit hohoe emabonakana, nijak Kurus gog kate, Uni tayom taram reak' hohoe emabonkana ar cela hoyok lagite hohoabonkana.

Isai dhorom reak' dahar do eken bahakote do ban sajawakana, menkhan mit-mit dhapre janumko menaka, taram pichare duk-muhim ar kostko menaka, disom hor ar somajren horke sec khon harkhet ar sasetko menaka. Aboak dinam din reak' Kurus gog kate, Uni tayombon taram khan, abo sanamko do mit din Uni leka nawã jionbon hatin nama. Dinam din reak' Kurus gog kate, Uni tayom tarante, jaejug jion menaka.

Dela, dularia Go- Baba, boeha-miserako, tehen Uni Probhu thenbon koema jemon abo sanamko do aboak dinam din reak' Kurus gogkate, Uni tayom taram reak' sahaj ar bhor danbon namma ar duk-kosto oktere Unire tehadok reak' sahaj lagitbon koema.

### Pahil Pat

Jeremia nabiaq' puthi khon tehenak' pahil pat

Jeremia 20:7-9

[7] E Probhu Isor, am dom bulau kedeñte inak' nonka dosa do hoyakantiña; ar in khonem daregete am dom jitau akana. In do goa dinge landa-dhut' an kan horgen hoyakana; ar sanam horge inko sirogañ kana. [8] In do tinak' dhao kathan roret' kan unak' dhaoge maraok' reak' kathagen porcaret' kana. Onate Probhu Isorak' katha iate in do goa dinge opoman ariñ cigari oco' kana. [9] Inin menkhan, "Uniyak' katha do ban laiya se uniyak' nutumte ar cet' ge ban roa," endekhan uniyak' katha do inak' ontorre lok' kan bursi seigel leka jan bhitri habic' bond akange tahenkana. In do bhitrire doho dohoteñ laña cabak' kana; sarige ona do ar ban doho dareak' kana.

Noage Probhuak' katha do.

Seren Ruarok' Orhe

Serenko 62: 2, 3-4, 5-6, 8-9

Coran: 62:2

Coran: E Isor, Inren Isor, Inak' jiwi do Am lagit tetañokkana.

1. E Isor, Amge inren Isor, Amin uiharetmea:

Am lagit inak' jiwi do tetañokkana:

Inak' hormo do Am lagit lalaokkana.

miten khangot ar rohor ot leka, one onde dak banuk.

2. Sonotakre Am beńgetamiń uruť urudokkana,

Jemon Amak dag ear ʘhonokiń nel.

Amak dular do ente jiwi khon do sorosgea:

Inak luťikin Amak sarhaoe beana.

3. Jiwet bhor Amin sarhaomea,

Am nutumte inak tikiniń atańa.

Inak jiwi do bhojre leka purunoka.

4. Am do ente jaogem goroadińa:

Amak phakrãk umulren hulã mongonokkana.

Inak jiwi do Amre japagokkana.

Amak jojom ti doe sap tarhaoedińkana.

## Dosar Pať

Romiko ʘhen bhoranić Prerit Paulusak ciťhi khonak teheńak Dosar Pať Romiko 12:1-2

[1] Eńdekhan E boehako, Isorak' noako daya iatege in do asokaeterń nehõrape kana, apeak' hořmo do jiwet', sonot ar Isore kusiyać dãřẽ menkate uni ʘhen samańtape. Ar onage apeak' lek reak' sewa do hoyok'a. [2] Noa barić piřhirenko leka do alope colona, bickom Isorge apeak' mon nãwãte tear ocowaepe ar purãte nãwã arok'pe, jemon Isorak' monejońak'pe bađae dařeak'. Isorak' monejońak'ko do bhagegea, ar purã khaťigea ar onate Isor doe kusik'kana.

Noage Probhuak Katha do...

## Sarhao Ařań

Ephes 1:17-18

Alleluia!

Probhu Jisu Kristren ac Baba do aboak mon reak mẽte marsaltabonma, jemonbon bađae, aboak hohore ceť as menaka mente.

Alleluia!

## BHAGE SOMBAT

Sonot Maťiye olakať leka Bhage Sombat

Maťi 16:21-27

[21] Un khonge Jisu do ac'ren celako laiyaćoe ehop'ena je, ac' do Jerusalemte calak' hoyok'taea ar murubbiko, marań naećeko, ar soster bađaeko hotete ađi okoc' duk jojom hoyok'taea. Are goc' ocok'a ar pe mãhã hilok're goc'ko khon uni do jiwet' beredok' hoyok'taea. [22] Unre Patras do begar idikedete nisřaueye ehop'keda, "E Probhu Isor noa do

am khon saharok'ma. Am cetanre nonka do tiske oho hoydarelana." [23] Jisu do acurente Patrasede metadea, "Eya Soetan in samañ khon pharakok'me. Am do in tak'kic'ic' kanam. Isor reak'ak'ko do bam moneyak' kana menkhan manwa reak'ak'gem moneyak' kana." [24] Ona tayom Jisu do ac'ren celakoe metat'koa, "Jãhãe inak' horte hijuk' sanayede khan uni do ac'ak' kusi sanaleka aloe calak'ma; menkhan ac'ak' kuruse gogma ar ine pañjañma. [25] Jãhãege ac'ak' jiwi bancaotae reak'e monejon, uni doe khuautaea; menkhan jãhãege in lagit' ac'ak' jiwiye khuautae uni do onae nama. [26] Jãhãege gota dhartiye hamette ac'ak' jiwiye khuautae endekhan cet' porho hoyok'taea? Se mit'ten hor ac'ak' jiwi bodolte cet'e emkea? [27] Manwa Hopon do ac'ren goðetko songekate apat reak' thonokanteye hijuk'a. Ar mimit' hor akoak' kami lekae halawakoa.

### Noage Probhuak Jisuak Bhage Sombat do...

#### Dhorom Galmarao

Kristre adi manotan dularia Go-Baba, boeha-miserako- jotoko Jisu marañ

Teheñ do bochor reak' bar gel dosarak Athwar kana. Teheñak Bhage Sombatr Probhu Jisu do ona kathageye metakko kana, oka do Preritko anjom ban sanaeyet'koa. Jisu doe metakkokana je Uni do Jerusalemte calak' hoyok'taea, murubbiko, marañ naekeko ar sastor badaeko hotete, marañ duk jojom hoyok'taea, gujuk' hoyoataea, ar pe mãhã hilok're gocko khon beret' ruarok' hoyok'taea. Patras Jisu thir lagite kurumutuyet'kana menkhan cet' porho hõ ban hoyokkantaea. Patras doe menet'kana, "E Probhu Isor noa do am khon saharok'ma. Am cetanre nonka do tiske oho hoydarelana." Manwawak' pontha do Isorak' pontha khon adige judagea. Manwawak' hudisko do Isorak' hudisko khon adige judagea. Manwawak' hudisko saote Isorak' hudisko do banje jurika.

Ona tayom Jisu do mit'ten dareyanak' hohoe emabonkana, , "Jãhãe inak' horte hijuk' sanayede khan uni do ac'ak' kusi sanaleka aloe calak'ma; menkhan ac'ak' kuruse gogma ar ine pañjañma."

Manwakoak' met' samandre, Kurus do harau reak' cinha kana, menkhan Jisu do Kurus jitau reak' cinhareye bodolkeda ar Harkhet saset do mahimareye bodolkeda.

#### 1. KURUS DO ISORAK' PONTA REAK' HISA KANA

Aboren Probhu Jisu do abo sanamko noa kathae metakbon kana je harkhet saset do adi hotat do ban hijukkana. Noa do mission kami reak' hisa kana. Patras do bina harkhet sasette babañcaoiç lagite khojkan tahena menkhan Probhu Jisu doe badae kan tahena je bina harkhet sasette, beret' ruar do banuka.

Abo sanamko hõ, aboak' dinam din reak' jionre duk-kosto, rua-hasuku, hados reak' oktere, Isor cetanre aas doho jarur tabona. Adi usarate, noa hudis do ban thika je Isor do aboak' jionre banuea se Isor do abo sanamkoye bagiakat'bona. Adhom oktere, Probhu Jisu haron-kosto reak' dahar hotetege, jaejug nam reak' daharreye idikyet'bona. Aboak' jion reak' Kurus do hamalgea menkhan ona hamal kurus gogtege, jion purire bon seter dareyaka. Aboak' jionre, Kurus do Uniak' pontha reak' hisa kana. Aboak' jionre, Kurus reak' mane menaka ar onate, ona kusite gog do, aboak' lek kami kana.

## 2. MANWA LEKA MOTO DO ALOBON HUDISMA

Jisu do Patrase metaekana, "Isor reak'ak'ko do bam moneyak' kana menkhan manwa reak'ak'gem moneyak' kana." Patras do Jisui dulardekana menkhan uniak' hudis do manwa leakage tahẽkana. Patras do thonoke khojkana menkhan bina harkhet sasette. Uni do alga dahargeye khojkan tahẽkana. Uni do harkhet saset begorge, thonok ar mahima neljone menetkana.

Aboak hudisko ho, Sonot Patrasak hudis leakage kana. Aboko ho, bina kamite taka-paisabon khojokkana. Bina olak-parhaote, bidaure monjte pasokbon menjonkana. Bina Bhage Sokolbarte, Paska Athwarbon khojkana menkhan noako do ban hoyoka. Bina gujukte, jaejug jion do banuka. Jaejug nam lagit ho, gujuk hoyoka. jionre sebel jo jom lagitte, kami ghatu do jaruge tabona.

Isorak ponthako bina bujhaute, onare taramge sari patiau do kana.

## 3. AMAK KURUS GOGKATE, UNI PANJAYEM

Jius doe menetkana, "Jahae inak' horte hijuk' sanayede khan uni do ac'ak' kusi sanaleka aloe calak'ma; menkhan ac'ak' kuruse gogma ar ine panjanma." Isai hoyok do alga katha kana menkhan Isorak katha leka jion kemao do alga katha do ban kana. Isai hoyok do- eken Athwar din girja calak do ban kana; eken maran porobkore seledok do ban kana; eken Baptisma hatao, girjare bapla ar mission reak koborre bae reak sujog moto do ban kana. Isai hoyok reak asol mane do kana-Probhu Jisuak katha leka jion kemao ar Uniren patiar cela hoyok. Isai hoyok reak asol mane do kana- nijak Kurus gog kate, Uni tayom taram ar Uni leakage, jion reak kusi-raska ar duk-kostoko sahao.

Aboak dinam din reak Kurusko do kana: nijren baeriko dular hatinako, aboren baeriko lagit bintie, rengec-nacarkore Jisu nel name, ar Uni leka aboak hohore patiar taken. Mit-etakko mahir mon salak goru hatinakoge- sari sabasi kana. Duk-kostore, Uni saote taramge- isai dhorom kana. Sanam oktere, Uni cetanre tehdokge- sari isai dhorom kana. Dinam din reak duk-kostoge, Uni then samankate taramge, porhonak dan kana.

## 4. KRIST LAGIT JIWI ALAE DO- MARAN PORHO KANA

Jisu doe menetkana, "Jahaege ac'ak' jiwi bancaotae reak'e monejon, uni doe khuatae; menkhan jahaege in lagit' ac'ak' jiwiye khuatae uni do onae nama". Tehen noa dhartiren horoko do noa kathageko metakbona, "Latu hor hoyokme, paisa-taka arjaujonme, dharti hametjonme, maran hor benao udukgokme..." menkhan aboren Probhu Jisu doe menetkana, goru hatinme, bagan hor hoyokme, badae alom dohoyea, cibanme, patiar taken ar dular reak dahar apnarjonme.

Noakoge, Isai dhorom reak sari cinhako do! Baeriko dular, baeriko lagit koe, harkhet sasetko sahao, dinam din reak kostoko raskate atan. Noakog dhorom kami do!

## 5. AMAK ONTORGE JOTO KHON PORHONAK DO

Jisu do noa kukli abo sanamko samanreya dohoyetkana, "Jahaege gota dhartiye hamette ac'ak' jiwiye khuatae endekhan cet' porho hoyok'taea? Se mit'ten hor ac'ak' jiwi bodolte cet'e emkea?" Abo do aema somoyge- dhon-sompod arjau lagit, taka-paisa kamao lagit,

oraċ-duaġ benao rakap laġit, marań hoġ ar laġu hoġ hoyok laġitbon kurumutuyetkana menkhan aboak jionre ar noa jionre joto khon maran dhon do kana- nijak atma bancaoge. Nijak atmabon bancaolekhan, abo do sanamak bon namakada. Noa dharti aboak jańga latarre doho kate ho, Jodi aboak atma Isor then samań lek se sodor lek bań taken khan, ona jion reak cet porho ho banuka. Aboak atma bancaoge joto khon marań porho do kana.

Aboak jionre, taka-paisa, dhon-sompod, oraċ-duarko hotete, abo sanamko do atma do babon bancao darekea, aboak atma bancao laġit do- Uni leka hoyok jaruġ tabona, Uniak sikhaua pańja hoyok jaruġ tabona ar Uniak gunko apnarjoń hoyoktabona; tobege sańi jaejug jion bon nama ar atma do bon bancao dareyaka.

## MUCAT KATHA

Dela tobe, dulańia go-baba, boeha-miserako, Kurus do jotowaċ mucaġ do bań kana. Kurusge jaejug jion dahar nam reak sagaġ do! Kurusge aboak bancao reak asol sadhon do! Kurusge aboak jiwedoċ reak karon do. Kurusge abo sanamko serma dhabiċe seterbona. Kurus nelte, alobon pac ruarokma. Kurus begor bancao banuka. Kurus begor jaejug jion ho banuka. Kurusbon pańjaema, ar jaejug jionbon hametjońma. Uni do, abo saote jaoge menaea. Kurus do jitau reak cinha kana. Kurus do jitkar reak cinha kana.

## Nehor Koe

**NAEKE / AYURIĆ:** Kristre dulańia Go-Baba, boeha-miserako, aboren Sisirjauic Serma Baba do Aċren sadher Hopon Jisu Krist hotete, aboak babańcao reak dahare namkeda. Uni do Aċren Hoponge aboak bancao laġite bachaokedea ar Uni laġit Kurus reak dahare apnarkeda. Uni Probhu do, aboko Uni tayom tamam reak sombate emabon kana. Uni pańja daharre jaruakko do, Uni thengebon jimama. Dela aboak koeko, gharonj reak koeko, somaj reak koeko, girja reak koeko ar disom reak koeko, Isor thenbon koema. **Dela aboak roġ ruar do hoyokma:**

**Probhu, aleak dinam din reak Kurus gogre goġo emalem.**

E Sisirjauic Sirjon Baba, ale do aleren Girjaren ayuriċ ar Guċpiċ, Dhorom Papa Liyo laġit'le nehorokkana, dayatamte, Amak bhor dante pereċ-purunkaeme jemon Uni do ayur reak dhorom kamire pańiare taken ar Jisu pańjate, rikir mone salak sanamko then Bhage Sombat doe seter dareyak. Noa dhorom ar bhage kamire, uni do serma sisirdake nam. Noa laġit' debon koema.

**Probhu, aleak dinam din reak Kurus gogre goġo emalem.**

E Sisirjauic Sirjon Baba, ale do ale dhorom subaren ayuiċ- aleren Bishop Baba- ..... laġit'le nehorokkana, amak sańai unire jhalakaome jemon uni do dhorom subaren sanam pańiauanko talaren Kurus reak bhage sikhauae hańinte, duk-kosto, harkhet saset, ar biġau reak oktere, sanam pańiauanko do keċeċko taken ar pańiaure hara-buruk reak sańaiko nam. Noa laġit' debon koema.

**Probhu, aleak dinam din reak Kurus gogre goġo emalem.**

E Sisirjauic Sirjon Baba, ale do disomren sanam ayurko lagit'le koeyet'kana, okoeko do disomko calao-benaoetkan ar disom lagit' an ar niyomko benaoetkan, Amak' daya-dular unko cetan re jhalkao ocueme jemon unko do disom hor'koak lahanti lagit'ko kamie ar unkoak duk-kostore gor' hatin lagit'ko lahak. Noa lagit' debon koema.

**Probhu, aleak' dinam din reak' Kurus gogre gor' emalem.**

E Sisirjauic Sirjon Baba, ale do disomren sanam sasetokkan hor'ko lagit'le nehorokkana, okoeko do ru' karonte, nacar karonte, gharonj karonte, juri-pari dular ban karonte ar dhorom karonte santauko jometkan, sanamko cetanre Amak' sahaj de jarieme jemon unko do, patiaure ketecko taken ar mit-etak boeha-miserako lagit' bhage namunako em hatin. Noa lagit' debon koema.

**Probhu, aleak' dinam din reak' Kurus gogre gor' emalem.**

E Sisirjauic Sirjon Baba, ale do sanam gharonjren hor'ko lagit'le nehorokkana, asokaete, gharonjren juri-pari, gidar-pidar'ko lagit', dayatamte bengetakome jemon gharonj reak' duk-bipotre, haron-kostore, Amre aasko dohoe ar jaoge dular-dupular, gor'gop'ro, ika-ipika tahente, gharonj do harak. Noa lagit' debon koema.

**Probhu, aleak' dinam din reak' Kurus gogre gor' emalem.**

E Sisirjauic Sirjon Baba, ale do unko hor'ko lagit'le koeyet'kana, okoeko do jion reak' kostoko karonte jion kemao reak' aasko atakat, cakri ban karonte hadosre menakko ar okoekoren do okoege banukko, Amak' sahaj unko sanamko cetanre de jhalkaome jemon unko Amak' sahajte jion kemao reak' aasko nam ar aloko aas chutauk. Noa lagit' debon koema.

**Probhu, aleak' dinam din reak' Kurus gogre gor' emalem.**

E Sisirjauic Sirjon Baba, ale do sanam doktor, sikhauna hatin amahasoe ar didi-muniko, bhalaj kamiako lagit'le nehorokkana, amak' dular reak' umulre sanam kamiakole jimayet'koa, bhor dan emakome jemon Isor do unko sanamkoak dani kami doe bhorakma ar napae hor'mo-jiwiye emakoma ar unkoak noa kami reak' porho do jemonko nam. Noa lagit' debon koema.

**Probhu, aleak' dinam din reak' Kurus gogre gor' emalem.**

E Sisirjauic Sirjon Baba, ale do sanam juan kor'ku'riko lagit'le nehorokkana, asokaete unko sanamko lagit'ge, okoe do dharti reak' maya-jala reak' jhalireko paraokkan ar marsal daharko bagiyakkan, unko sanamko Amak' bhor dan emakome jemon unko do gatiko talare ar somajren hor'ko lagit' bhage namunako uduk ar somaj ar girja lahantire, tiko hatin. Noa lagit' debon koema.

**Probhu, aleak' dinam din reak' Kurus gogre gor' emalem.**

E Sisirjauc Sirjon Baba, ale do noa mission dinda ar atu-tola reak girja lagitle arojetkana, Amak bhor dan de jhalkaome jemon joto patiauan boeha-miserako do ciban kate, nijak Kurus gog kate, ika-ipika hatin kate, ar goro-gopro hatinte, Jisuren patiar celabon hoyok. Noa lagit' debon koema.

**Probhu, aleak dinam din reak Kurus gogre goro emalem.**

**NAEKE / AYURIC:** E dularia Serma Baba ar sanam sahairen Jharna, Am do Amren Hopon Jisu Krist ale banco lagit, noa dhartitem kolkedea. Uni do dharti manwako banco lagit, Kurus reak dahargeye bachaokeda. Teheñle samanakat, aleak koeko de atantaleme ar Amak sonot mone leka de purautaleme. Dinam din ciban reak sahai emalem ar Kurus gog kate, kusi-raska salak, Am panja reak sahate pereckaleme bare. Janumte pereckan daharre, sahao reak dare ar dil emaleme. Kurus panjte, jaejug jion reak dadi then seterkaleme. Ini aleren Probhu Krist hotete. **Amen.**

Fr. Nanku Nicholas Besra SDB  
Don Bosco High & Technical School PVT ITI  
Don Bosco Road, Krishnanagar, Nadia